

爲善之樂。得道之好。天爵之榮。勤修八德。快覓真詮。修羅觀此。尤宜覺悟。我爲修羅。攪亂性道。推人上岸。而自墮苦海。眞是不值。須趕緊回頭。滅孔廢禮之新學小夫。讀此書當思。拾人餘唾。何如尋我。固有道德文章。舉一切申韓刑名政客。讀此書當各各返省。雙方比較。則天良流露。眞理自明。大家共赴龍華大同之治。其現象矣。是書爲老道奉命編纂。故略舉凡例。以便讀者洞澈宗旨。了悟大綱。

### 三丰道人識

一 朝代國名旁用——

一 人名及代替箇人名稱旁用——凡共同與當面之稱呼不用（有時因上下關聯亦準用之）

一 地名及特別場所旁用——凡屬於籠統者不用以免煩雜

### 校印者附識

## 瑤池老母序

蟠桃宴記。記蟠桃宴之事也。今日尙未收圓。正式大宴未開。又將何記。此記得無虛乎。曰。此記爲普度之促進。而收圓之開始也。吾娘之爲此記。心力瘁矣。回憶前劫庚子之際。軍會遞嬗。娘心大慟。念九二之莫返。痛哭失聲。遂至引動修羅。下擾塵世。冀我原人。將富貴看穿。紅塵看淡。各返天良。相約歸家。諭勅發下。而懊悔不贏矣。今幸三教聖人。差遣門徒。然證下世。主辦收圓。關皇承乾。力扶景運。吾娘乃喜不自勝。爰將蟠桃宴記。頒垂順洱。諸子誠能仰體吾心。或出錢。或出力。各盡其能。不令吾有絲毫之牽累。吾當有以報之也。所望我靈種。趁此時期。各尋回家之路。依照記上行持。生悔生悟。生感生愧。生羨慕心。生有爲心。生果敢心。急去尋求先天大道。認明指路之碑。以八德五倫立其基。性命雙修爲其果。母子團圓。其有日矣。蟠桃宴後。妙果高臻。娘心又何愁苦之有哉。嗚呼。蟠桃宴記。皆諸仙濟世之啼聲。與吾慈娘之淚痕血片也。記云。乎哉。娘願修羅。其各速速返本。放下屠刀。停戈息鼓。莫再造孽城。墮入幽陰。又增娘二次之痛哭也。勉哉。

甲戌年荷月望日

無極老母降於從善四壇

## 玄靈上帝序

垂書。非易言也。垂救時濟世之書易。而垂濟天下後世之書難。蓋書所以載道。非道不足以濟時。不足以救世。更不足以流傳今古。即傳矣。亦不過一時。而欲求能濟一時之人心。天下後世之人心。則非經即傳也。此書豈易垂哉。蟠桃宴記。收圓之寶筏也。濟世之金鍼也。大同之嚆矢也。吾帝爲著此記。已用盡不少之心血矣。古今人才難得。有其人而無其力。有其力而無其才。縱有神功。亦難印洽。乩生之選。已極慎重。吾帝之於此書。曾三折其肱。而費盡無窮之心矣。勅令諸仙領導遊生沿途歌詠詩詞。皆以世道爲前提。道德爲依歸。釐定收圓章則。尊崇倫紀綱常。放楊距墨。以正人心。皆本孔子春秋筆削之旨。正名定分。胥令天下後世人心。復歸於正。蟠桃宴記之著。夫豈爲慰母心。辦收圓已哉。願人閒赤子。天下蒼生。咸憬然於孝悌忠信禮義廉恥之行。而立綱常彝倫之體。父其父。子其子。君其君。臣其臣。兄其兄。弟其弟。夫其夫。婦其婦。友其友。不惟家齊國治。世界大同。其可卜矣。此記之垂。豈偶然哉。定一仙史之編校是書。亦可謂殫盡心血矣。吾帝信賞必罰。特於書首而褒美之。以勵儒門之子。而促我九靈根也。諸子勉乎哉。靈根勉乎哉。

天運甲戌年荷月吉日

赦罪天尊敘於蒲門之東山閣

## 道德天尊序

三龍運會。劫近延康。正天地否塞之際。大道晦盲之時。挽之不易。救之良難。其機謀穎達之士。莫不趨赴潮流。浮沈世俗。與洪波巨浪。相推逐。相波靡。以求時榮而爭世祿。庸愚下智之子。則尋幽僻自修之途。而無牖民覺世之心。維道濟時之志。而世道愈以趨下。而不可收拾矣。嗚呼。三會收圓。誠匪易也。無極老母。時與吾三教會議。欲於是時。須將九二殘零。一齊度回西天。不許一人流浪東土。老母之願誠奢。而其心極苦矣。吾三教聞母諭後。無有良策。惟自愁苦而已。關皇上帝身任收圓。良圖別具。乃命八聖分途尋訪善人善地。付以書卷。以爲普度收圓之筏。亦何妙也。滇西地面。洱水西流。古時佛國。三期之世。靈種猶多。自然而然。亦似有安排者。故順寧滄江內外。諸善信之善力深宏。過乎洱源。而洱源抱定諸生。天生賢哲。又復爲之補助。關皇卽以蟠桃宴記付之。不百日而全書闡出。又不一年而全書編成。收圓張本已定。而老母蟠桃宴會。乃不虛開矣。九六原人。亦可完全返本矣。老母之心慰。吾老頭之心亦慰矣。關皇請吾著序。以勗原人。乃降至蒲門。書此以爲靈種勸。爲修羅勸。且嘉順寧全一主一昌一元一等之功。而猶欣喜洱源抱一定一諸子也。書之垂世。豈易也哉。讀者其謹體之而細味之。

蟠桃宴記 序

甲戌年荷花生日 太上道祖降於蒲門東山從善四壇

## 釋迦文佛序

自科學發明。而哲學荒棄。聖道廢弛。聖道廢弛。而異端邪說。日漸橫漲。如驚濤駭浪。而世道人心。愈不可收拾。吁。可畏也。當夫前劫庚子。運會已兆下元。老母念三龍之將至。九二之難收。瑤池慟哭。感動修羅。領旨下世。已肇今日之亂端。而開收圓之影本矣。三教諸佛聖賢仙眾。莫不愁現於色。歎劫運之難挽。而收圓之難辦也。夫治亂循環。否泰剝復。自然之理。須當其機。而運轉之。潛移而默化之。非可以勢力爲也。老衲當時。卽與道祖宣父計議。早知今日修羅。勢窮力屈。不能不屠刀放下。入我範圍。皈依淨土。帶業往生。二聖亦各遣門徒下世。約伴歸家。然銜玄傳走馬之後。原人已大半登舟攏岸。老母心猶未釋。關皇乃請特頒蟠桃宴記。紀明此次收圓之顛末。老母望兒之殷勤。三教設法之苦心。諸仙佛聖賢救世之勤勞。況瘁。一一記載詳明。無非望原人知非知過。知懼知悔。速入善門。修至道。而赴蟠桃宴也。嗚呼。蟠桃記上。西天大路。已經指明矣。願我三教門徒。十方善信。慎勿失此奇緣。而負老母。負關皇。負諸天仙佛聖真。負垂書諸子。勿再蹈苦趣。落輪迴也。其各勉哉。

天運甲戌年荷花生日 如來世尊降於蒲門之東山寺

## 大成至聖序

道不可離也。大道之在人間。如日星麗天。江河行地。亙古不易也。雖有時虧蝕混濁。無傷也。世不亂不治。道不晦不明。晦之之時。即是明之日。晦之即所以明之也。延康午會。其何時乎。日麗中天。大道光明之日也。然不經晦盲否塞。則人習見其光明。又何知其光明乎哉。嗚呼。大道之淪湮久矣。士子尋章摘句。以六經爲進身之階。咬文嚼字。一竅不通。居然自命爲明經達事。究不知其明何經而達何事也。道之不明。由來久矣。然當時未通經義。猶且不失經旨也。五倫八德常體也。詩書禮樂常修也。孝悌忠信常講也。綱紀彝倫常飭也。今日何日乎。禮教廢。綱紀淪。父子平等。夫妻自由。綱紀倫常。完全掃地。彌天黑暗。滿地腥羶。而自命爲吾儒門士子者。數典忘祖。研物質。講學科。究法律。窮氣化。日在推波助浪。深入楊朱墨翟之門。精攻申韓孫吳之學。異端蜂起。聖學荒蕪。正此時也。嗚呼。吾道窮矣。大道之不行也。我知之矣。三期普度。道在儒門。學校皆與吾道爲敵。大道將何明而行耶。吾道之明。其將借善壇之醞釀。而後使之發華敷。前劫庚子。老母思念九二原人。修羅因之奉命混世。吾已早知聖教將湮。而莫可收拾矣。今幸關皇秉承母命。主辦收圓。調選吾徒。皆入善壇善社。發揚蹈厲。大爲闡揚。著出無數書篇。光輝聖道。今又演蟠桃宴記。發明三教真理。而歸本吾儒。以爲三會收圓張本。嗚呼。全一定

一諸子仰體天命。翊衛吾道。其皆吾之徒與。此書成帙。收圓有本矣。關皇無憂。老母喜慰矣。吁。聖道豈可一日離哉。此書一出。吾道明矣。吾道行矣。吾故喜悅而敘之。

天運甲戌年荷花生日

東魯尼父降於蒲門東山泗水之間

# 圓通古佛序

傷哉世道。痛哉人心。愈勸愈惡。愈演愈橫。當此之際。誠不可救藥矣。吾慈願大志奢。誓將九二殘零。度轉還家。以慰母望。收圓大任。一身當之。麻鞋踏破千千雙。木筆寫窮萬萬管。手掌皮肉。層層摩穿。眼裏珠淚。顆顆滴盡。深情莫訴。時嘔五夜更詞。大願難償。日走三千雲路。何災不救。何地不臨。無求不應。無劫不消。無非爲我慈悲一片難刪。殘零萬分繫念也。嗚呼。人心似鐵。難化難移。劫運如雲。愈排愈密。化身月影千江。救不圓十分浩劫。廣放蓮花百舌。勸不轉九六原人。我心如醉。母意怎安。爰與關皇上帝相商。垂書覺世。幸得然鐙古佛下世。啓教度人。三期劫至。會趕三龍。五會期臨。人爭一鹿。修羅混世。掃盪綱常。楊墨翻波。廢除禮教。人希禽獸。裸體何羞。學效蠻夷。異言是貴。時勢趨下。莫此爲極矣。吾慈雖千萬化身。其如彼何哉。且幸靈根佛子。所在多生。開壇闡教。竭力維持。宣化勸人。眞誠不輟。吾慈復與關皇上帝深懇。老母頒恩。將蟠桃宴記。發下順寧。令洱源楊子抱一定一。張子妙一。遊冥著演。復將編輯全責。付與定一。令三丰暗中助筆。全一校正訛誤。擔任資財。吾慈命題之後。不復問及其事。而全一諸子。竟將全書告成。行將付印矣。吾慈聞之。欣喜無任。取書閱之。曰。此收圓寶筏也。可上慰母心矣。可下度殘零矣。嗚呼。聖賢仙佛。垂慈憫苦。定抱妙全。竭血殫精。言言金石。字字珠璣。眞是

三會之奇書。足爲收圓之寶錄。可與洞冥寶記。後先輝映。永傳不朽矣。謹爲之敘。

甲戌年荷月 南海大士降於蒲門從善四壇

## 文昌帝君序

聖人之道。如日月经天。江河行地。天地壞而聖道不壞。天地否而聖道不否。自洪荒以迄於今。未有魔道昌明。而聖道絕滅者。亦未有魔力能勝道力者。雖其顯晦有時。蓋爲昌明大道。不能不以魔力砥礪之也。若謂道之砥礪。卽視爲道之魔障。是不知體用也。有道要有魔。無魔道不成。盡人知之矣。知之而復爲魔力所戰勝。是則欲勝理衰。並未認識大道爲何物也。三期末劫。日麗中天。正大道發華之時。亦卽魔力伸張之日。不知魔爲道生。必疑天公不仁。倒行逆施。甘逐下流。無所不爲矣。老母知道魔之不能並立。故爲道而生魔。以魔力增長道力。又恐世人趨於魔途。故闡經著訓。以解明之。蓋善惡對待。道魔並興。不可易也。使三期不遇收圓。則必無此魔力。使延康不值封神。則必無此道功。理勢之自然。亦陰消陽長之機緘也。中國大同景運。從未實施。而今將開。故真大同之前。必有假大同者爲之引。真平等之前。必有假平等者爲之導也。蟠桃宴記一書。其中多言治體治要。敦倫飭紀。修身齊家治國平天下之旨。體裁取法洞冥記。而宗旨不同。真度世之寶筏。大同之鐘磬矣。吾帝退歸紫極。煉性參禪。不有要務。多未臨凡。與諸子相別已久。今日奉關皇請命。著序書首。以勗諸生。並告我儒門哲士。九二原人。收圓有日。大道有歸矣。蟠桃已熟。老母盼望。各其勉之。予日望之。

甲戌年荷月 七曲山人序於順寧東山閣

## 孚佑帝君序

自洱源洞冥記出。善壇之內。已無可降之書矣。而各處善壇。頒恩不絕。著演之書。汗牛充棟。而無可當意者。吾深憫焉。三期普度。旨在收圓。老母憂原人久未上岸。欲頒書以促之。下勅命。吾尋求闡書之人。負責之地。吾走遍天涯。尋徧南北。終無可負責之人。吾深憂之。不意滇雲深處。紅光錯彩。吾乃將書名宣示松鶴山頭。令李子全一往尋抱定諸子。協同辦理。百日功成。何其速也。聖功神化。還須人力扶持。諸子之功。誠不朽矣。吾帝讀之。此書無處不奇。足見大士之善於布置。而亦原人之有幸也。夫善書多言玄言道。習焉不精。語焉不詳。東鱗西爪。斷簡殘篇。未若此書之一線穿珠。起伏照應。玄蘊宏宣者。吁。洞冥奇矣。而此書尤奇。洞冥妙矣。而此書尤妙。洞冥記苦樂相因。善惡相乘。而此書則有樂無苦。同同皆是玄機。篇篇皆含道要。以之修身。可以之煉己。可以之學仙。學佛。希聖。希賢。可以之治國。平天下。亦無不可。吾竊以治世寶鑑。收圓寶符名之。豈僅記云乎哉。乃走筆書之如是。冀世人善讀之可也。

甲戌年荷月 純陽道人敘於蒲門從善四壇


無極老母聖相



無極老母相讚

無生無極至聖至尊生成萬物  
孕育乾坤呼曰老母德難比倫  
凡有血氣總沐皇恩玉露金盤  
歎息香兒墮落蟠桃宴記收圓  
赤子歸根贊莫能贊名無能名  
洵源沐恩赤子楊定一敬讚

關 上 帝 聖 相



關皇上帝相讚

主乾坤之正氣  
斡造化之機樞  
綱維宇宙道義  
匡扶頒蟠桃記  
著大同書三國  
英雄千秋守正  
三曹帝宰萬世  
宗儒

洱源沐恩仙史楊定一敬讚